



dia Kongo, Bintuadi nsambodia bikubikanga Bundu dia Kongo.

4. Bintuadi biobio i biabi : Kintuadi kia Na Nlembo a Mfumu, Kintuadi kia Mfumu a Zola, Kintuadi kia Mfumu'a Kitamina, Kintuadi kia Na Mpungi'a Mfumu, Kintuadi kia Na Matanina Ludi, Kintuadi kia Mfumu a Mansueki, ye Kintuadi kia Mfumu a Lufua.

5. Babo basanisinanga Kinzambi kia Bakulu beto ku Kongo, bafuete yonzama babo mu DIBUNDU DIMOSI kaka, i BUNDU DIA KONGO, dina ye Bintuadi nsambodia.

6. Nkumbu za Mabundu momo mantama zifuete sobua. VUVAMU, lenda kituka Kintuadi kia Na Matanina Ludi. Mbuta Nkusu lenda sikila Mfumu a Kintuadi kiokio.

7. Kionso Kintuadi kina kala ye Mazikua mandi, mana sadila mu nkalasani ye Simbi kiavana Nkumbu andi kua Kintuadi kiokio.

8. Malongi ma Bundu dia Kongo mana kala mamosi mu Bintuadi biabio. Kionso Kintuadi kina kala ye Minsamu miankaka mitadidi kaka Kintuadi kiokio.

2. MBILA KUA BISIMBI NSAMBODIA

9. Na Nlembo Mfumu I Ngeye Simbi kizeye tunga ye tulula. Ngeye Mfumu'a Ntoto wa Mbangala. Ngeye Simbi kizeye ziona Miela miena mu kinkole, ye nata mio va mbata Mongo wa Kimpuanza kiakedika I
Vana Lendo kiaku kua Bundu dia Kongo, kidivo diakatula Bana ba Kongo mu Tombe kia nzimbukusu, ye kubanata mu Ntemo waludi.

10. Mfumu Mavana Nkembo I
Ngeye Simbi kivananga Nduenga za Ne Kongo Kalunga. Ngeye Mfumu'a Zola kusikilanga mu ntangi yi ka yimani. Ngeye Simbi kizeye vana Nkumbu zakedika, kadi mansueki maku menina mu Ne Kongo Kalunga, walungila mu babo ye biabio.
Bika Nkumbu'a Bundu dia Kongo yakota mu mintima miamio mia Bana ba Kongo, ye fulusa Nza yamvimba mu Muingu wa Bundu dia Kongo.

11. Mfumu'a Kitamina I
Ngeye Simbi kizeye vambisa ye yonzeka. Ngeye Simbi kizeye sueka ye monesa. Ngeye Simbi kizeye tunga lufulu luakedika mu Kongo dia Mbumba I
Fila Ngangu zaku mu yinza dia Kongo, kidivo ziza zatunga lufulu luakedika lua Bundu dia Kongo, lua Kongo diampa, ye nata dio ku ndungunu yalunga.

12. Na Mpungi'a Mfumu I
Ngeye Simbi kikundanga mu Fulu Kianlongo. Ngeye Ntemo wena mu kati kua Ntemo. Ngeye Mpungi'a Mfumu mu Kongo dia Mbumba.
Bika Mpungi'aku yatendana mu ngolo beni, ye kulumuna ngitingila yanene, yina nata Bundu dia Kongo ku ndungunu, mu mvita zandi zazo.

13. Mfumu'a Mansueki I
Ngeye Simbi kimonesesanga Kieleka. Ngeye wena Tuti dia Tiya va mbata Mongo Wanlongo. Ngeye Simbi kinatanga Miela mu Kinlongo kia Ngindu za Ne Mbumba, wawumba zulu ye ntoto. Ngeye Simbi kiena ye Sabala kia Tiya va koko.
Vana nsabi za Tiya tuaku kua Makesa ma Bundu dia Kongo, kidivo masema ye sivikisa Nza mu kimpeve ye mu kinsuni.